

Marina kesal Datuk Harun dibebaskan tanpa diampun

KUALA LUMPUR, Sabtu.— Ahli Majlis Tertinggi UMNO, Puan Marina Yusof melahirkan rasa terkejutnya terhadap keputusan Lembaga Pengampunan yang mengambil keputusan membebaskan Datuk Harun Haji Idris, tetapi tidak mengampunkan kesalahannya.

Lebih memeranjatkan lagi, Pendaftar Pertubuhan menolak permohonan Datuk Harun untuk bergiat dalam politik, katanya, menekankan peluang Datuk Harun berkhidmat terlalu tipis.

Puan Marina yang juga peguam berkata, keputusan Pendaftar Pertubuhan sangat merugikan UMNO dan ahli-ahli parti yang memilih beliau sebagai Naib Presiden UMNO.

"Saya dukacita benar Kerajaan membebaskan tahanan ISA tanpa syarat. Saya berharap Datuk Harun juga dibebaskan tanpa syarat," katanya ketika ditemui malam tadi.

Menurut beliau, dengan keputusan Pendaftar menolak permohonan Datuk Harun dan Lembaga Pengampunan tidak mengampunkan kesalahannya, Datuk Harun terpaksa menunggu lima tahun untuk bergerak dalam politik seperti termaktub dalam Pindaan Akta Pertubuhan.

Puan Marina berkata, memandangkan umur Datuk Harun sudah lanjut, pastilah lima tahun bagi dia tidak secergas sekarang.

Datuk Harun juga terpaksa menunggu enam bulan jika ingin membuat rayuan pengampunan. Lembaga Pengampunan bersidang setiap enam bulan sekali.

Bahan asal dari Arkib
Negara Malaysia